

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

**R J E Š E N J E**  
**o koncentraciji privrednog subjekta „Alpine Mayreder Bau GmbH“, Republika  
Austrija i privrednog subjekta „Fomento de Construcciones y Contrata, S.A.“,  
Republika Španjolska**

**Sarajevo**  
**Februar 2007. godine**



Broj: 01-03-26-012-22-II/06  
Sarajevo, 15. februar 2007. godine

Na osnovu člana 25. stav (1) tačka e), člana 42. tačka d) u vezi s čl. 12., 14., 16. i 18., te u skladu s članom 24. stav (2) Zakona o konkurenciji («Službeni glasnik BiH», broj 48/05), po Prijavi namjere koncentracije između privrednog subjekta Fomento de Construcciones y Contrata, S.A. Federico Salmon 13, Madrid, Republika Španjolska i privrednog subjekta Alpine Mayreder Bau GmbH, Alte Bundesstrasse 10, Salzburg-Wals, Republika Austrija, zaprimljenoj pod brojem 01-03-26-012-II/06 dana 02.08.2006. godine, Konkurencijsko vijeće, na 41. (četrdesetprvoj) sjednici održanoj dana 15. februara 2007. godine, je donijelo

### **R J E Š E N J E**

1. Ocjenjuje se dopuštenom koncentracija na tržištu usluga građevinarstva i proizvodnje građevinskog materijala u Bosni i Hercegovini, koja nastaje sticanjem većinskog učešća u privrednom subjektu Alpine Mayreder Bau GmbH, Alte Bundesstrasse 10, Salzburg-Wals, Republika Austrija, od strane privrednog subjekta Fomento de Construcciones y Contrata, S.A., Federico Salmon 13, Madrid, Republika Španjolska.
2. Ovo Rješenje se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH» i službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Privredni subjekt Fomento de Construcciones y Contrata, S.A., Republika Španjolska (u daljem tekstu: podnosilac Prijave ili FCC) kao podnosilac prijave, je dostavio Prijavu namjere koncentracije Konkurencijskom vijeću, dana 02.08.2006. godine, zaprimljenu pod brojem 01-03-26-012-II/06, kojom namjerava kupovinom većine dionica privrednog subjekta Alpine Mayreder Bau GmbH, Salzburg-Wals, Republika Austrija (u daljem tekstu Alpine) postati njen većinski vlasnik.

Prijava namjere koncentracije je zasnovana na odredbama člana 14. stav (1) tačka a) Zakona o konkurenciji (u daljem tekstu: Zakon) jer je ukupan ostvareni godišnji prihod sudionika koncentracije na svjetskom tržištu iznosio preko 100.000.000,00 KM po završnom računu u godini koja je predhodila koncentraciji, te činjenici da privredni subjekat Alpine, kao jedan od učesnika koncentracije, je prisutan na tržištu Bosne i Hercegovine preko svojih subsidijarnih društava.

Ukupan prihod učesnika predmetne koncentracije ostvaren na svjetskom tržištu u 2005. godini iznosi:

<b>R.b.</b>	<b>Naziv učesnika koncentracije</b>	<b>Ukupan prihod - 2005</b>
01.	FCC	(..)** <sup>1</sup> KM
02.	Alpine	(..)**KM

<sup>1</sup> (..)\*\* Podaci predstavljaju poslovnu tajnu

Prijava namjere koncentracije podnesena Konkurencijskom vijeću (u daljem tekstu: Prijava), dana 02.08.2006. godine, nije bila kompletna, u smislu člana 31. Zakona, te je Konkurencijsko vijeće dopisom broj 01-01-26-012-1-II/06 dana 01.09.2006. godine, u smislu člana 31. stav (2) Zakona, od podnosioca Prijave zatražilo dopunu podataka.

Podnosilac Prijave je dostavio traženu dokumentaciju podnescima: broj: 01-03-26-012-2-II/06 dana 15.09.2006. godine, broj: 01-03-26-012-3-II/06 dana 25.09.2006. godine, broj: 01-03-26-012-4-II/06 dana 29.09.2006. godine i broj 01-03-26-012-5-II/06 dana 18.10.2006. godine.

Uz dokumentaciju podnosilac Prijave između ostalog, u skladu sa članom 30. Zakona, je dostavio i Odluku o odobravanju namjeravane koncentracije od strane Europske komisije i Rješenje o dopuštenosti koncentracije Vlade Republike Crne Gore.

Nakon dostavljene kompletne Prijave, u skladu sa članom 30. Zakona, Konkurencijsko vijeće je izdalo pisanu Potvrdu broj: 01-03-26-012-6-II/06 dana 10.11.2006. godine, kojom je potvrdilo da je podnosilac Prijave dostavio kompletnu i urednu Prijavu.

Konkurencijsko vijeće je na osnovu podataka iz Prijave, kao i drugih podataka relevantnih za predmetnu koncentraciju izvršilo preliminarnu analizu i ocjenu namjeravane koncentracije i na osnovu analize je konstatiralo da nije moguće utvrditi strukturu relevantnog tržišta i efekte predmetne koncentracije na relevantna tržišta odnosno na ostale stvarne i potencijalne konkurente.

Slijedom navedenog, Konkurencijsko vijeće na 36. (tridesetšestoj) sjednici održanoj dana 22.11.2006. godine broj: 01-03-026-012-9-II/06 je donijelo Zaključak o pokretanju postupka ocjene dopuštenosti koncentracije po predmetnoj Prijavi, u skladu sa članom 32. stav (2) Zakona.

Konkurencijsko vijeće, u postupku ocjene namjeravane koncentracije, je uputilo Podnosiocu prijave zahtjev za dopunom podataka dana 01.12.2006. godine broj: 01-03-26-012-14-II/06. Podnosilac Prijave je podneskom broj: 01-03-26-012-15-II/06 dana 22.12.2006. godine dostavio tražene podatke: usaglašeni popis subsidijarnih privrednih društava učesnika koncentracije u Bosni i Hercegovini, procjenu tržišnih udjela učesnika koncentracije u Bosni i Hercegovini i popis i procjenu tržišnih udjela glavnih tržišnih konkurenata učesnika koncentracije na relevantnim tržištima u Bosni i Hercegovini.

Također, Konkurencijsko vijeće je zatražilo dodatne podatke i od nadležnih institucija Bosne i Hercegovine, u smislu člana 35. Zakona s ciljem utvrđivanja materijalne istine.

### **Pravni osnov i oblik koncentracije**

Pravni osnov za Prijavu je Ugovor o kupnji dionica zaključen između FCC i skupine većinskih dioničara Alpine, zaključen dana 26.07.2006. godine.

U predmetnom Ugovoru je navedeno da privatna fondacija Pappas Privatstiftung, Salzburg, Republika Austrija posredno preko privrednog subjekta Alpine Holding GmbH ima većinsko učešće u privrednom društvu Alpine Mayreder Bau GmbH, Republika Austrija. Ovim Ugovorom privatna fondacija Pappas Privatstiftung, Salzburg, Republika Austrija, prodaje, ustupa i prenosi privrednom društvu FCC kompletan vlasničko učešće u privrednom društvu Alpine Holding, tako da privredni subjekt FCC postaje većinski vlasnik privrednog društva Alpine Holding sa (..)\*\*% dioničkog kapitala i glasačkog prava.

U Prijavi je navedeno da privredni subjekt Alpine Holding ima većinsko učešće u dioničkom kapitalu privrednog subjekta Alpine Mayreder, tako da sklapanjem navedenog Ugovora, privredni subjekt FCC postaje većinski vlasnik privrednog subjekta Alpine Mayreder.

Pravni oblik koncentracije je stjecanje kontrole privrednog subjekta Fomento de Construcciones y Contrata, S.A. nad privrednim subjektom Alpine Mayreder Bau GmbH, Salzburg-Wals, Republika Austrija, putem preuzimanja većinskog učešća u osnovnom kapitalu, u smislu člana 12. Zakona,

Slijedom navedenog, a u smislu člana 16. Zakona, privredni subjekti učesnici koncentracije su obvezni podnijeti Prijavu, u skladu sa članom 12. i članom 14. Zakona u roku od osam dana od zaključenja sporazuma.

### **Sudionici koncentracije**

Sudionici koncentracije su privredni subjekt «Fomento de Construcciones y Contrata, S.A.» Federico Salmon 13, Madrid, Republika Španjolska, i privredni subjekt Alpine Mayreder Bau GmbH, Alte Bundesstrasse 10, Salzburg-Wals, Republika Austrija.

#### Fomento de Construcciones y Contrata, S.A

Privredni subjekt Fomento de Construcciones y Contrata, S.A., Federico Salmon 13, Madrid, Republika Španjolska je registrovan u Trgovačkom registru za grad i provinciju Barselona. Dionički kapital privrednog subjekta FCC upisan i isplaćen upotpunosti, iznosi (..)\*\*miliona KM i to u obliku registriranih dionica.

Glavna poslovna djelatnost privrednog subjekta su usluge građevinarstva koje obavlja samostalno i s privrednim subjektima sa sličnim registrovanim poslovnim djelatnostima. Privredni subjekat FCC niti je prisutan na tržištu Bosne i Hercegovine i nema prodaju niti pruža usluge na istome.

#### Alpine Mayreder Bau GmbH

Privredni subjekt Alpine Mayreder Bau GmbH, Alte Bundesstrasse 10, Salzburg-Wals, Republika Austrija, kao vodeća kompanija grupacije Alpine Holding GmbH, je privredno društvo s ograničenom odgovornošću osnovano po zakonima Republike Austrije. Većinsko vlasničko učešće u privrednog subjektu ima privredni subjekt Alpine Holding GmbH od 94,0%, dok preostalih 6,0% vlasničkog učešća posjeduje Erste Bank AG, Republika Austrija. Glavna poslovna djelatnost ovog privrednog subjekta su različite vrste usluga u sektoru građevinarstva.

U 2005. godini privredni subjekt Alpine Mayreder Bau GmbH, ima registrovana subsidijarna privredna društva na području Bosne i Hercegovine s vlasničkim učešćem:

- Alpine Investment društvo za građenje d.o.o. Sarajevo (Skenderija 5a, Sarajevo) (..)\*\*0%
- Alpine Rudnik krečnjaka Lapišnica d.o.o. (Čeljigovići bb, Istočno Sarajevo) (..)\*\*0%
- Alpine BH društvo za izgradnju vodovoda d.o.o. Travnik (Zenjak bb, Travnik) (..)\*\*0%

kao i subsidijarna društva u zemljama okruženja Bosne i Hercegovine:

- Alpine Bau Zagreb d.o.o. Zagreb, Republika Hrvatska (..)\*\*0%
- Garazna Hisa d.o.o Ljubljana, Republika Slovenija (..)\*\*0%
- Alpine Consulting d.o.o. Celje, Republika Slovenija (..)\*\*0%
- Alpine Inženjering d.o.o. Celje, Republika Slovenija (..)\*\*0%
- Alpine Mayreder Bau d.o.o. Maribor, Republika Slovenija (..)\*\*0%
- Alpine Bau d.o.o. Beograd, Republika Srbija (..)\*\*0%
- Alpine Aleksandar d.o.o. Skopje, Republika Makedonija (..)\*\*0%

## **Analiza relevantnog tržišta**

Relevantno tržište, u skladu sa Zakonom i Odluci o utvrđivanju relevantnog tržišta («Sl. glasnik BiH», broj 18/06) čini tržište određenih proizvoda ili usluga koje su predmet obavljanja djelatnosti učesnika koncentracije na određenom geografskom tržištu.

U analizi relevantnog tržišta Konkurencijsko vijeće ocjenjuje dopuštenost predmetne koncentracije utvrđujući strukturu relevantnog tržišta, kao i tržišne udjele učesnika koncentracije na relevantnom tržištu.

U predmetnoj Prijavi relevantno tržište čini:

- (1) usluge građevinarstva što u konkretnom slučaju podrazumijeva visokogradnju, niskogradnju i konstrukcijski inženjering.
- (2) proizvodnje građevinskog materijala - kamena krečnjaka.

Budući da učesnici predmetne koncentracije djeluju na cijeloj teritoriji Bosne i Hercegovine preko subsidijarnih društava relevantno tržište u geografskom smislu smatrat će se cijela teritorija Bosne i Hercegovine.

Slijedom navedenog, relevantna tržišta predmetne koncentracije su pružanje usluga u segmentu građevinarstva i proizvodnja građevinskog materijala - kamena krečnjaka na cijeloj teritoriji Bosne i Hercegovine.

U analizi relevantnog tržišta korišteni su podaci iz Prijave, a također su traženi i odgovarajući podaci od nadležnih institucija Bosne i Hercegovine (Vanjskotrgovinska komora Bosne i Hercegovine itd.). Na osnovu dostavljenih podataka Konkurencijsko vijeće je utvrdilo da sudionici koncentracije odnosno subsidijarna društava u Bosni i Hercegovini u segmentu usluga građevinarstva imaju tržišno učešće oko 1,0%, dok subsidijarna društva na relevantnom tržištu proizvodnje kamena krečnjaka imaju tržišno učešće oko 3,0%.

Glavni tržišni konkurenti Alpine Mayredera na relevantnom tržištu usluga građevinarstva u Bosni i Hercegovini su: GP Put - Sarajevo, Hidrogradnja d.d. - Sarajevo, ŽGP- Sarajevo, GP Bosna putevi - Sarajevo, GP Vranica - Sarajevo, Krajina d.d. - Banja Luka, Integral inženjering - Laktaši itd.

Glavni tržišni konkurenti Alpine Mayredera na relevantnom tržištu proizvodnje građevinskog materijala – kamena krečnjaka u Bosni i Hercegovini: Rudnik krečnjaka i tvornicu kreča d.d. Doboj, krečnjak - Stara Dubrava - Čelinac, konkurencija iz uvoza itd.

## **Procjena koncentracije**

Konkurencijsko vijeće nakon procjene i analize podataka i činjenica u postupku donošenja predmetnoga Rješenja, je utvrdilo da provođenjem namjeravane koncentracije privrednih subjekata neće doći do sprječavanja, ograničavanja ili narušavanja tržišne konkurencije na relevantnim tržištima, i ista će osigurati unapređenje tržišne konkurencije u oblasti usluga građevinarstva i proizvodnje građevinskog materijala u Bosni i Hercegovini.

Konkurencijsko vijeće je utvrdilo postojanje većeg broja privrednih subjekata na relevantnim tržištima Bosne i Hercegovine, što ukazuje na činjenicu postojanja značajne konkurencije, kao i tendenciju daljnjeg razvoja i rasta relevantnih tržišta. Također, Konkurencijsko vijeće je utvrđeno da u Bosni i Hercegovini ne postoje pravne ili ekonomske prepreke za ulazak potencijalnih privrednih subjekata na relevantna tržišta.

Konkurencijsko vijeće pri donošenju ovoga Rješenja je posebno imalo u vidu da se namjeravanom koncentracijom značajno ne povećavaju postojeća tržišna učešća učesnika koncentracije na relevantnom tržištu, te u skladu sa tome se ne stvara dominantni položaj koji bi za posljedicu mogao imati značajno narušavanje tržišne konkurencije u Bosni i Hercegovini, u smislu odredbi Zakona.

Radi toga Konkurencijsko vijeće je ocijenilo predmetnu koncentraciju dopuštenom u smislu člana 18. stav (2) Zakona, i odlučilo kao u dispozitivu ovoga Rješenja.

#### **Administrativna taksa**

Na ovo Rješenje podnosilac Prijave, u skladu sa članom 2. tarifni broj 107. stav (1) tačka d) pod 2) Odluke o administrativnim taksama u vezi procesnih radnji pred Konkurencijskim vijećem («Službeni glasnik BiH», broj 30/06), je obvezan platiti administrativnu taksu u iznosu od 25.000,00 KM u korist Budžet institucija Bosne i Hercegovine.

#### **Pouka o pravnom lijeku**

Protiv ovoga Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 (trideset) dana od dana prijema ovoga Rješenja, odnosno od dana njegovog objavljivanja u «Službenom glasniku BiH».

**Predsjednik**

**Gordan Raspudić**